

मार्निंग डोगरी न्यूज बुलेटिन, समें. 09.20 Hrs

<><><><><><>

Headlines

- प्रधानमंत्री नरेंद्र मोदी हुंदे सोशल मीडिया एकाउंट एक्स पर फॉलोवर्स दी गिनतरी 10 करोड़ शा मती होई गई ऐ।
- पिछले 16एं दिनें च श्री अमरनाथ जी दी पवित्तर यात्रा पर औने आहले श्रद्धालुएं दी गिनतरी 3 लख दे आंकड़े गी पार करी गई ऐ।
- फौज नै उत्तरी कश्मीर दे कुपवाड़ा जिले दे केरन सैक्टर च कब्जा रेखा कश 3 आतंकवादिएं गी मारी मकांदे होई घुसपैठ दी इक कोशश गी नाकाम बनाई दिता ऐ।
- केंद्री मंत्री डॉक्टर जितेंद्र सिंह होरें आखेआ ऐ जे हर कुसै गी सियासी विचारधाराएं शा उप्पर उठियै राश्ट्री स्तर दे विकास प्रोजेक्टें गी सबूरा करने च अपना योगदान देना लोड़चदा ऐ।

<><><><><><>

PM-Folloers

प्रधानमंत्री नरेंद्र मोदी हुंदे सोशल मीडिया अकाउंट एक्स पर उन्दे फॉलोअरें दी गिनतरी 100 मिलियन दा आंकड़ा पार करी गई ऐ। इस टकोहदी बढ़ोतरी च पिछले त्रऊं बरें च 30 मिलियन फॉलोअरें दा इजाफा दिक्खने गी लब्बा। हुन प्रधानमंत्री नरेंद्र मोदी होरें गी इसलै एक्स पर दुनिया दे सब्बनें शा मते फॉलो कीते जाने आले बने गे न।

ओह 38.1 मिलियन 3 करोड़ 81 लकख फॉलोअर आले अमरीकी राष्ट्रपति ते 65 लकख फॉलोअर आले कनाडा दे प्रधानमंत्री जस्टिन ट्रूडो थमां बड़े अग्गे न। इस उपलब्धि मगरा प्रधानमंत्री होरें इक सोशल मीडिया पोस्ट च इस मंच पर सक्रिय होने दी खुशी जाहिर कीती ते चर्चा, वाद-विवाद, लोकें दा आशीर्वाद, रचनात्मक आलोचना लेई आभार जताया। गृहमंत्री अमित शाह होरें एक्स पर 10 करोड़ दा आंकड़ा पार करी लैने पर प्रधानमंत्री होरें गी बधाई दिती ऐ।

<><><><><><>

Amarnath Yatra

श्री अमरनाथ यात्रा दे पैहले 16 दिनें च 3 लकख शा मते श्रद्धालुएं दक्खन कश्मीर दे हिमालय दी गुफा च पवित्र शिवलिंग दे दर्शन कीते। आधिकारिक सूत्रें मुजब 14 ज्हार 974 श्रद्धालुएं हिमलिंग दे रूप च भगवान भोलेनाथ हुदं ऐतवारें दर्शन कीते। एहदे कन्नै अजें तोड़ी श्री अमरनाथ जी यात्रा आस्तै आए दे श्रद्धालुएं दी गिनतरी 3 लकख 9 ज्हार 77 पुज्जी गई ऐ। जम्मू दे भगवती नगर आले आधार शिविर थवां 4 ज्हार 875 श्रद्धालुएं दा इक होर जत्था श्री अमरनाथ जी दी जातरा लेई अज्ज बड्डलै रवाना होआ। एह सारे श्रद्धालु 162 गड्डिएं दे काफिले च सोआर होइए निकले न। अज्ज आले जत्थे च 3 ज्हार 464 मर्द, इक ज्हार 333 महिलां, 14 बच्चे, 57 साधु ते 7 साध्वियां शामिल हियां। 1 ज्हार 918 श्रद्धालु बालटाल लेई ते 2 ज्हार 957 श्रद्धालु पहलगाम लेई रवाना होए जित्थुआं ओह अपनी अग्गे दी जातरा गी शुरू करडन।

<><><><><><>

Sarthal-Devi

श्री अष्टदश भुजा माता सरथल देवी जी दी पवितर सालाना यात्रा कल किशतवाड़ च शुरू होई। यात्रा दा शुभारम्भ गोरी शंकर मंदर सरकूट च आयोजित इक भव्य हवन कन्नै होआ जेदे च श्रद्धालुएं खरी मती तादाद च शामिल होइए आहुतियां ते पूर्ण आहुतियां दितियां। सनक्खी शोभा यात्रा दे कन्नै छड़ी मुबारक गोरी शंकर मंदर दा शुरू होइए मुबारक चौगान मैदान, शहीदी चौक ते बस स्टैंड चा गुजरी।

<><><><><><>

Jagannath Rath Yatra

भगवान जगननाथ हुंदी रथ यात्रा दा महा महोत्सव कल बड़े जोश जज्बे कन्नै उधमपुर दे इस्कॉन मंदर च मनाया गेआ। इस मौके भक्तिभाव कन्नै भरोचे दे केई धार्मिक ते सांस्कृतिक कार्यक्रम पेश कीते गए। इस्कान मंदर चा शुरू होइए रथ यात्रा धार रोड, वीनस चौ, सैला तलाब, चबूतरा बजार, मेन बजार, कोर्ट रोड, सलाथिया चौक ते दोमेल शा निकली। स्हाड़े संवाददाता कन्नै गल्लबात करदे होई रथ यात्रा दे आयोजक होरें दस्सेया।

<><><><><><>

LG-Deligation

श्रम ते रोजगार मैहकमे सने युवा सेवाएं ते खेड्डें सरबंधी मैहकमे दे केंद्री मंत्री डाक्टर मनसुख मांडविया होरें कल राजभवन जाइयै लेफ्टिनेंट गवर्नर मनोज सिन्हा हुंदे नै मलाटी कीती। प्रवक्ता मुजब इस मलाटी दरान बाद्दे दिएं बक्ख-बक्ख संभावनाएं बारै चर्चा कीती।

तोआईं भलेयां लौहके-लौहके ते दरम्याने दर्जे दे उद्यमें दे विकास सरबंधी फोरम दे प्रतिनिधिं अपने संस्थापक प्रधान रजनीश गोइंका हुंदी अगुवाई च एलजी मनोज सिन्हा हुंदे नै मलाटी कीती। इयां गै जनता दल यूनाईटेड जम्मू-कश्मीर दे इक डेलीगेशनै अपने प्रधान जी. एम शाहीन हुंदी अगुवाई च एल.जी मनोज सिन्हा हुंदे नै मिलियै उनेंगी सार्वजनिक हितै आले बक्ख-बक्ख मामलें बारै अवगत करोआया। एहदे अलावा साबका मंत्री अब्दुल माजिद वानी होरें बी लेफ्टिनेंट गवर्नर हुंदे नै मलाटी कीती।

<><><><><><>

NTA

राश्ट्रीय परीक्षा एजेंसी एनटीए नै ऐलान कीता ऐ जे ओह् CUET-UG दे प्रभावित विद्यार्थिं दा परतियै म्तेहान लैग। एह् म्तेहान 19 जुलाई गी कम्प्यूटर आधारित होग। विशे-कोड दा जिक्र करदे होई इनें प्रभावित विद्यार्थिं गी ई-मेल भेजी दिता गोआ ऐ ते दाखला कार्ड बी तौलें गै जारी करी दित्ते जांगन। दाखला म्तेहान जंदे मई म्हीने 379 शैहरें च लैता गोआ हा ते इंदे चा 26 केंद्र मुख्य थमां बाहर हे। पैहली बारी एह् म्तेहान ऑनलाइन ते ऑफलाइन दौनें तरीकें राहें होआ हा। हासल जानकारी मुजब अस्थाई आन्सर की 7 जुलाई गी जारी कीती गई ही ते 9 जुलाई तगर एहदे पर ऐतराज मंगे गे हे।

<><><><><><>

Infiltration

फौज नै उत्तरी कश्मीर दे कुपवाड़ा जिले दे केरन सैक्टर च कब्जा रेखा कश 3 आतंकवादिं गी मारी मकांदे होई घुसपैठ दी कोशश गी कामयाबी कन्नै नाकाम करी दिता ऐ। कब्जा रेखा पर तारबंदी दे भलेयां नेड़े किश संदिग्ध नक्लो हरकत दिक्खने परेंत फौज आस्सेआ ऑपरेशन धनुष-2 नां दा अभियान रम्भेया गोआ। फौज दे सौहगे जवानें घुसपैठिएं गी ललकारेया जेदे पर उनें गोलीबारी शुरू करी दिती। जवानें आस्सेआ कीती गेदी परते आहली कार्रवाई च 3 घुसपैठिए मारे गए। फौज नै टाक्करे आहली थाहरै थमां थेआर असलाह ते होर जंगी समेयान बरामद कीता ऐ। फौज दा एह अभियान अजें जारी ऐ।

<><><><><><>

Union Minister Jiterdra

केंद्री मंत्री डॉ. जीतेन्द्र सिंह होरें आखेआ ऐ जे हर कुसै गी सियासी विचारधारा थमां उप्पर उठिए राश्ट्री स्तर दे विकास प्रोजेक्टें गी सबूरा करने च अपना योगदान देना लोड़चदा ऐ। एह गल उनें उधमपुर च बीजेपी वर्करें गी संबोधित करदे होई आक्खी। लगातार त्री बारी सांसद ते केंद्री मंत्री बनने परेंत डाक्टर सिंह कल पैहली बारी उधमपुर पुज्जे ते पार्टी कार्यकर्ताएं दा धन्नावद कीता। मंत्री होरें आखेआ जे उधमपुर दे ऐसे केई दुध उत्पाद न जिनेंगी उत्थे बनाए जाने आले नमें औद्योगिक एस्टेट च मार्के दे तौर पर इस्तेमाल कीता जाई सकदा ऐ। उनें गलाया।

<><><><><><>

J&K-Sports Minister

केंद्री युवा मामले ते खेड्ढ मंत्री डॉ. मनसुख मांडविया होंरें आखेआ ऐ जे जम्मू-कश्मीर खेड्ढें दे विस्तार आस्तै तेजी कन्नै इक मुख थहर स्पोर्ट्स हब बना'रदा ऐ। उनें कश्मीर च राष्ट्री टीमें दे केंपें दी मेजबानी करने आस्तै जम्मू-कश्मीर खेड्ढे काउंसिल दी तरीफ कीती ऐ। उनें भरोसा दोआया जे भारत सरकार जम्मू-कश्मीर च खेड्ढें दे विकास कन्नै जुडी दी सुविधाएं गी मता बेहतर बनाग। उनें श्रीनगर च पोलो ग्राउंड स्पोर्ट्स कम्प्लेक्स दा दौरा कीता ते खडारिएं ते स्कूली बच्चें कन्नै गल्लबात कीती। इस मौके बोलदे होई केंद्री मंत्री होंरें ऑल इंडिया फुटबॉल फेडरेशन तरफा ब्लू कब्ज पैहल दी शुरूआत पर खेड्ढे काउंसिल बकखी ब्लू कब्ज शुरू करने दा मकसद फुटबाल दी खेड्ढे गी जमीनी स्तर पर मजबूत करना ऐ। मंत्री होंरें इक साइकल रैली गी झंडी दस्सिए रवाना बी कीता जेदे च खेलो इंडिया सेंटर साइक्लिंग, बडगाम दे खडारिएं हिस्सा लैता। एहदे मगरा मंत्री होंरें इंडोर स्पोर्ट्स कम्प्लेक्स दा दौरा कीता जित्थे खरी मती गिनतरी च खडारी ते स्कूली बच्चे मौजूद हे। इक सांस्कृतिक कार्यक्रम च शिरकत करदे होई मांडविया होंरें स्थानीय कश्मीर ते डोगरी लोक नाच दी सराहना कीती ते जिम्नास्टिक ते पैनचॉक सिलाल खडारिएं देशानदार प्रदर्शन गी बी सराहेया।

<><><><><><>

Samba-Agriculture

जिला प्रशासन सांबा नै राई-बाई विभाग कन्नै रलिए किश गेंह्ी पुट्टियां जेदे कन्नै सांबा जिले दे करसानें गी पेश आवा'रदियां दिक्कतें गी दूर कीता जाई सकै जेदे च खास करिए बन्ने पर तारबंदी कोला अग्गे आली जगह पर राई-बाई मुख ऐ।

इस जगह पर 1999 दे बाद राई-बाई नेई कीती गई ऐ। मुख्य राई-बाई अधिकारी मदन गोपाल सिंह होरें आखेआ जे तकरीबन 500 कनाल जमीन पर रढ़ कीती जाग जेड़ी बन्ने कन्नै लगदी ऐ। इंदे च चलेयारी खुर्द, चलेयारी कलान, सयाल, राजपुर दे चचवाल ग्रां दे थार शामिल न। राईबाई उत्पादन ते करसान कल्यान विभाग सांबा नै उनें करसानें गी 5 क्विंटल मैश वेरायटी वलब 1 दे बी दिते न जिंदी तारबंदी पारा जमीन पर राई बाई कीती जा'रदी ऐ। इस पहल कन्नै सीमा कन्नै लगदे लाहकें च रवा'रदे करसानें च नमीं आशा जगी ऐ ते उंदी आमदन च बी बाददा होग।

<><><><><><>